


वाख
व्यथ मा छि शॉगिथ

बिमला रैना



=====
Rewritten in Standardised Devanagari-Kashmiri Script by M.K.Raina,
Vasai, Mumbai with due permission from the author.

My sincere thanks to her.

Work completed on 12.02.2005 ~ Updated 09.04.2020
=====



Bimla Raina

१

प्वख्तु कारु पोत हे निशि दरबारस
म्वख्तस रँत्नन बर मव माल ।
नॉल्य् लालु मालु शाह सवारस
रोज़ राज़दारस नॉली नाल ॥

२

सथ सथ बोलुवुन सतुता यिये
म्वख्तस रँत्नन निये ख्यथ ।
ह्यनु रोस दिथ गछ रोज़ि नु फिये
सासु नोव सँहज़ु वति दिये गथ ॥

३

सँहज़ानंदा सँहज़ु वारे
अमृतु नारे छकुवुन रूद ।
सासु बज़ु विगनि नोमरिथ कारे
लछि बज़ु लालु मालु दिथ गँयि सूद ॥

४

जम जम नार लोग नरकस नार वुछ
स्वर्गुक्य् द्वार वुछ यलु गँयि तौर्य ।
शोज़ बोज़ क्रिँच स्वर्गुक द्वार मुछ
हेरि बापार वुछ ख्वख सोंतु ब्रौर्य ॥

५

मनुक मोनुम लोगुस फांसि
काँछर वाँसि करुन प्योव ।

अकलि वनुन यस प्रोन्न काँसि
माँछर छाँछि नोव ज़न ज़्योव ॥

६

शब्दाह सज़े पोज़ाह पज़े
अपुज़ दज़े पोत हेयि यम ।
आगुर वुज़े सागर ग्रज़े
हागूर वज़े ज़ीरु बम ॥

७

नेशब्द हशमतु सेमंज़ वनस
दोश बोज़ मिलुविथ दोल तय नाल ।
तमहुक्क्य काड वॅक्य वॅक्य मनस
ज्वनस फिरिथ गाडन ज़ाल ॥

८

स्वखन डुस्य् तु यड नो बरन
द्वखु कि दगि हरन आय ।
स्वखुक ग्रौंड सासि लटि मरन
द्वखय छौंड नोव ज़न ज़ाय ॥

९

नॅविस नु नव्यर तु नोवुय रोश
हिव्य् न्युव होश तु पडा प्योव ।
अथन नु लोर दंदन जोश
लॅछुन लोछ छ़ि ख्योव ॥

१०

सम्सौर्य वानय खेयि कुत्पु ब्रमन
सँमिथ समन काँत्याह ज़ाय ।
वांगुज देह पुछ्य मुहिमुत्पु गमन
कँह मोर्य चादर ख्वखलिथ द्राय ॥

११

पछि गौँचुम येछि योछुम
वछि वाँलिजि कोतुम रथ ।
वाँल्य् वांदुर ज़न मे नोचुम
अदु मोचुम वतु गथ ॥

१२

हारि नु पचुन व्वजुम खार
मोर्य खेयि हार ग्वडु बोर क्याह ।
वांगुज वाँरिस तु दारस तार
मनुनि नु नार म्वरदन बाह ॥

१३

लो लो करान ललुवुम मे ते
स्वते स्वते गौँडुन नार ।
बाँज्य् गारन बाँज्य् दिच़ ल्वते
मे छ्वचि वते लोगुम तार ॥

१४

व्वंदय व्यौदिम व्वंदय मौँदुम
व्वंदय वाँदिथ वुछुम ज़ूल ।

फुलय फोलिथ फलाह छौंदुम
फरिकि फहा पॅयिथ ठूल ॥

१५

पॉन्य पानस पानय तोलान
पॉन्य पानय शिन्याह मूल ।
नारु ब्रेहन शुन्या शोलान
पॉन्य पानय पनुन गूल ॥

१६

सुन्ननि पाव्यन पानाह सुति युस
मति मॅतिस व्वद्धमय ।
ग्र्वकु ग्र्वकय अखाह गितिस
स्वन्नर सोतिथ सोदा म्वय ॥

१७

सु दय सॉदिथ मदु पान वोलुम
शिनि बोलुनोवुम सन ची तार ।
हन के हुमन हुरि कर्मु खुर ज़ोलुम
हर रुमय पोलुम दर्मुक सार ॥

१८

सौंतय ज्वन दियि ज़ॉव्युल ज़ातस
ज़ुल ज़ख व्युल ज़ालि ज़ुल्मातस ।
संगर मालाह फ्वलि मंज़ रातस
सॉलाह वॅरिथ यियि कायनातस ॥

१९

पीरु सुंद वनुन युस थवि वने
कल करि मने द्यन क्योहो राथ ।
जॉविलि सॉविलि ज्वनु युस सने
तँस्य अदु नने हदि जुल्माथ ॥

२०

हदाह त्रँटिथ नदाह वसान
सदाह रोस्तुय वसान शोन्य ।
गाह छटान स्वंदर मालाह
स्वनाह वथरुन सासु दोन्य ॥

२१

शॉनिस वॉनिथ ग्वताह मोर
अथय खारे दुरय लाल ।
डालि राजु हंसस तारि अनुवारे
कुलि जहानुक मुशीरि माल ॥

२२

स्वनु दनु सन्यच्च्यथ बॅर्यजि डबन
आयस वॅन्यजि वॅर्यजि क्याह ।
अन्न ख्यन वॅहरुक बॅर्यजि गबन
शाहस वन्यजि वॅर्यजि क्याह ॥

२३

सेकि डोर्यन सग द्युन रावी
डुलु डारन रावी ब्योल ।

मनत्यखन सॅन्य कथ रावी
अनिमस रावी ऑल तु खोल ॥

२४

दून्य दूनिस वुच्चे वुच्चे
रज़ाह गँडनम मूनिस ताम ।
वोवुर्य वूनिस रच्चे रच्चे
सुच्चे कपटस नोव अंदाम ॥

२५

शाह बॅनिथ अछ द्वारिकाये
न कुनि दानुच ति बॅर्यज़ि यिं ।
सति ह्योर आगुर शिव गंगाये
तथ सगुवानस ग्छ्यज़ि लय ॥

२६

प्रँज़ ज़ॉन्य वुछिवन च्नेनख तते
मखमलस येते हौंदुर नार ।
सासु बॅद्य गुहोशल प्रज़लान अते
शाहमार स्वते म्वते व्यच्चार ॥

२७

गाशिल्य गाह त्रोव गॉबिल्य ग्वफे
ज़ॉव्युल ज़रबाफ हॉव्युल गव ।
नॉविथ नव प्रॉविथ छ्वपे
अ-ब्यनु वुफे अमृथ चव ॥

२८

येम्य युथ मोगुस तस त्युथ पोच्युय
पाँन्य पानस हे च्युय न्यफ ।
पाँन्य पानस पानय व्योच्युय
क्यथु लागि संसौर्य कात्रे च्यफ ॥

२९

वोंट मनाह खोतुम बारि
कोताह चारि सोदागार ।
नफच्युन्य खार नखि खँन्न हारि
तोताह कारि गँडिथ खर ॥

३०

च्युय दीवु आसुवुन दीशि दीशन
कुनि मीशस च्यु ना खॉल्य ।
च्युय तँपिथ तपु रीशन
देहु वस्त्र च्येय नाँल्य ॥

३१

पम्पोश छँतर ती छुस वीगिस
म्वनि पीटस प्यठ तस जाय ।
प्रवु कोफूर रंगु तस जूगिस
जिंदु मॉरिथ नोव तति आय ॥

३२

प्वन्याह ज़ेनुन पनुनिस रतस
गीर्य गतस ने ज़बॉन्य लोग ।

वोंताह ह्योन असली सतस
नाहकु क्याह हतस कलाह दोग ।.

३३

बूगु ब्छिरय दयस पूजन
क्रंज नालय रँटिथ साल ।
मॉल्यु पोथरन दासाह रोजन
बेछि कतरन सोतरिथ बाल ॥

३४

तन मन नावुन त्रु संघाये
बवुन्यु अंदर बडि आगूर ।
स्वनु सॉव्यु सपदन र्वपु कायाये
तति हेरि जाये ललुवान नूर ॥

३५

सतु यूग्यु सनन अथ वॉरागय
गथ मूक्ष प्रावान समि सीमाब ।
राजु यूग्यु बूगु बलु डलि प्रयागय
तामसु यूग्यु दमु ज़न सथ वुछि खाब ॥

३६

त्रुमाह वॉयिथ बाह पूर्यु साज़स
राज़ाह बँनिथ चवान दाम ।
तीरुक तछुन तनि बाज़स
सँनिस राज़स हेयि कुस साम ॥

३७

सतुत्य् दिगु दिचम रंगन
ह्यंगन कौरुम पोशि पौराव ।
यिथ्य तुथ्य मंगन जंगु व्वंगन
सौबरिथ सम्यव राजाह जाव ॥

३८

रोश दुयितिस मानस अज्ञानस
ख्वश अपमानस तु ज्ञानस रोज़ ।
माछुक मेछर कुनुन रोज़ वानस
कँव बोज़वुन अँदुर्य द्यानस रोज़ ॥

३९

पोन्य पाताल अंबर पानय
सिरिं चंद्रम कुलि बुतराथ ।
जीवु ज़ौचन वावु नचानुय
ब्यन तस कुनि छे नु अख ज़ाथ ।

४०

मौरन ह्यचोम लँब्बु लँब्बु पकुन
छ्वकुन द्युतुम ह्यकुन प्योम ।
ग्वरन हाव्योम नाबद टकुन
कथव वखनुम अथव ख्योम ॥

४१

म्वलुर्यो! म्वल ज्ञान म्वलुलिस पानस
मायायि ज़ाल विज्ञानस सुत्य् ।

ज्वल चठ च्यथ फिर अँदुर्य द्यानस
च्यतु रस चथ ति अबिमानस कृत्य् ।।

४२

मँछ्युल माज़ वथुरुम मैचे
रचे रचे द्युतुमस दाह ।
सतव पूरिथ हतन त्रै
तन्नर तते मुछिमस खाह ।।

४३

हसर केँह नो संसौर्य मानस
दानस युथ ज़न शेश्तर ज्युन ।
पोन्य ज़न सारव रुमि दार बानस
ख्यन ज़न लागि अँहनाजन कुन ।।

४४

जलुर्य ज़ाल वँलिम पानस
कानस दरे मँरिम शाल ।
खर गँडिम गॉव गानस
बानस छँडुम बाह कुर्य दाल ।।

४५

छ्यटन श्रोन्न खेयस शकव
त्रकव ख्योम ककव माज़ ।
मुलुख तुलुम यलव रूवकव
फ्रवकव हूरिथ गँयस बाज़ ।।

४६

कुनुन कोडुम मे वानु वानु
मे पॉन्य पानु पानस फोर ।
कल कर छलु गोर चावान पानु
बु मे म्योनुय मनस ठौर ॥

४७

तन कोफुर रंग क्वंगु विंन
मनु गोड दिस ज्वन व्वथुराव ।
नाव, गुथुर लोसन नु ज्यवन
अंदु अँजरिथ व्वंदु सथुराव ॥

४८

प्राण उकुवनु कुकिलि गिति वुटुम
दमु अमुकुय द्युतुमस ठोठ ।
प्राण फुकुवनु सोथ दिनु पोडुम
ब्रम ख्यमुकुय ओतमस मोठ ॥

४९

न्यबर हॉविथ अंदर मँशरोवुथ
ब्रॉंत कवु थोवुथ मायायि काल ।
वटुन अय ओसुय क्याजि वाहरोवुथ
बय कवु थोवुथ फहि यमु ज़ाल ॥

५०

चोनुय अनहार आलुम्य् ऑनस
छुख व्वपदॉविथ करान मार ।

लागि रोस शुब क्याह चंदुकिस गॅहनस
बागि रोस बेयि अथ दिवान नार ।।

५१

मेछर नेरि नो डाकु मुजन
मेञ्चि टुजन नु मकायि सोत ।
म्वख्तु व्वपदिनु वीरि कुजन
शीन बनि नु नारु तोत ।।

५२

नोंग तमि नो ठोर दिनु वावस
किथु थोप दियि कावस कांह ।
ग्रख यस लागि अंदुकिस बावस
पुनिम तस नो मावस ज़ांह ।।

५३

सृष्टियि अंदर मायायि मंदर
मूर्ती अंदर पॉन्य पान ज़ान ।
शाह सॉर कर पानस अंदर
सु चुय अंदर फिरिथ द्यान ।।

५४

लोलुकि तोलु दरु हर मेलानय
कनुवुन सु पानय बन खॅरीदार ।
कल कर मॅल्य ह्यन मनु प्रॅन्न वानय
ज़ेवि कर ठानय कर मु इज़हार ।।

५५

डबि नोच्चुम छ्वन्य् गव स्वबरु
खबर हेच्चुम कनन याम ।
छ्वन्यस तम लोग सोजाह ज़बर
सौरुय बुय तय बु कुस ताम ॥

५६

नैदरि अँदरय क्रखाह लायान
अथव वायान नगारु डोल ।
सोपुन्य् संज् स्यथुर छायेन
हुशौर्य ह्यसव दिथ गच्छि दोल ॥

५७

हाँकल दिच्चुम संसौर्य गबस
नबस खोरुम हा तय हू ।
तमाह मोहरुम नफुच्च्य् बबस
द्वबस त्रोवुम क्रूद तय मोह ॥

५८

दयि दयायि रँहबर बेटे
कोछ्छ् द्युन लोलु ल्वंगुन्यव माल ।
आत्मु गूल सुय रटि व्वटे
तस कति मटे संसौर्य ज़ाल ॥

५९

ज़्यव लूसुम मंगान मंगान
तोति मंगनु थँचिस नो ।

नरि गजम मोर रंगान
ब्रोंह हनाह ति पॅचिस नो ॥

६०

कुस ओस नेह ब्राँच फेरान नदहरि
वॅग्म्य् ऑस चॅटमुच्च चँदुरय माल ।
तसुय स्वखाह यसुय र्यदु फरि
युस गव फिरिथ अंदुर्य लाल ॥

६१

न स्वरुन न परुन
न मरुन न ज्योन
न ख्वशी न खरुन
न खोन न छोन
न वदुन न ज़रुन
न खँटिथ न नोन
न फटुन न तरुन
न सियाह न गींन

६२

मदुक मोदरेर कोरुथ वेथे
बदस दिच्चुथ अंदर जाय ।
स्वनु थोद म्वल अँकिस थि
हतस कथे कुनुय दाय ॥

६३

सैदरि बाला स्वंदर शीरिथ
व्वंदर फीरिथ पेमुन्न माय ।
बंगु ज़न मँन्नरिथ गोमुत नीरिथ
बाज़ाह हूरिथ आमुन्न गींय ॥

६४

बहा खँस्यतन सतन नबन
पान्युक हसर गल्यस नो ।
आत्म अँच्यतन लँन ब्यबन
रछ ति हना डल्यस नो ॥

६५

वनन मंज़ लाल
बाज़ नियि फोतन ।
चँट्यतोस ज़ाल
सिरिथि खोतु ज़ोतन ॥

६६

ड्यकुकिस लीखिस मख नो च़टे
आयस ब्रुंज़ाह छ्वटे नु ज़ांह ।
मछि हुंज़ि पखि येटि नाव नो फटे
वेथि किथु आंगलि रटे कांह ॥

६७

मखमँल्य् बागन हून्य् छरन
लबरन जरन स्वन तु लाल ।

ह्यनुर्य बलन, वेंदुल तरन
गोबुर्य रतस रटन माल ॥

६८

ज़िंदस करान शी शी द्रुनय
माज़स राजव बैरुस माय ।
बस्ति बैरहस तोमलु गुनय
हँस्यतिस खँसिथ ओखुन्य् दाय ॥

६९

यंगय मुश्कि अंबर छटे
रुवंगस कुवंगस कर्या मान ।
जाँहिल बेबि किथु सिरिं खटे
ऑलिम अँलिमस गछ्या फान ॥

७०

कुहरिस मनस लाकम दिचुम
मँहरिथ च्यतव वँडिमस तान ।
दँहरिस पानस ताह ताह पुचिम
प्रतव मोचुम देह रोस तिन ॥

७१

ग्वगर सॉरिय अंदर त्रोपिम
लंगर लेजन गजन ठान ।
अन्न थुर मंथुर यंथुर श्रोपिम
दातु अदु ज़ोनुम आत्म ज्ञान ॥

७२

युथ नो डलख कुनि नो कैह छुय
अँदुर्य पलन ह्यख क्याह साम ।
नेबरु अँदरय यँद्रियन बेह छुय
पनुन्य रेह छय पानस तान्य ॥

७३

दुखस जाय येम्य नो दिच्युय
स्वखस प्रतय येम्य नो बर ।
म्वखस त्राश येम्य नो हैच्युय
गीता तमी प्रानव पर ॥

७४

हंसय बूल्य हंसव पँरुम
हंसन वँरुम पॉरी ज्ञान ।
हन हन गॉलिथ हंसा गोरुम
हंसय वोरुम ला मकान ॥

७५

अँछन गटु ज़ोल युसुय कासे
बे ख्वद देह निशि युसुय गौव ।
ताँल्य ज़्यव ठँठरिथ अमृथ फासे
गँल्य गंडु ज़ेवि कंडु तँमी चौव ॥

७६

बंदन माल गँडुम हले
च़ोखुर्य बस्ति छले कुस ।

व्यंदन व्यंदन श्राख तले
मॅरिथ मरन फले मुस ।।

७७

दंदु बर्यन व्यपन अँज
तोमलय दँज छटु वाव ।
ग्रटिनि दोल ग्रटस संज
गाँटु मुठिस स्वनुक बाव ।।

७८

चटुख सॉरी संसॉर्य बसदन
छुख चु पनुन व्यंदन कस ।
प्राण प्राणन प्राणुय वंदन
नाहकय लोगमुत शींकिया मस ।।

७९

व्वखुल्य् नाव लाकम अथस
व्वखुर्य वतन कथन सोज ।
पखुच चॉरिथ पयि किस रथस
वायुक वसवास त्रॉविथ बोज ।।

८०

अन्यव अनिरय वुछुय नोनुय
जर्यव जरिरय बूजुय सथ ।
कल्यव कजिरय मनस खोनुय
त्रु वॅकुर्य प्रॉविथ परमु गथ ।।

८१

लोलु लालुनि म्युल कर लालन
ब्रम बोज़ मॅशरिथ गरु संसार ।
ल्वलि ल्वलि ललुवुन च्वशवुन्य् कालन
नूर फ्वलि बालन पूर ब्रह्मसार ॥

८२

अज़ुय स्वरि युस पगाह फ्वले
वले संतोशुक अँतलास ।
छय स्वथ यस कालय डले
खले खलस तस डुबु डास ॥

८३

लछस कुलुफ तु वछस छाव
म्वखस म्वहर मनस ताव ।
त्र्वदि च्यथ ब्वदि ग्राव
ब्यंदु दय सैदि नाव ॥

८४

रुश दुय चरचुन मनस मोशुम
ग्रटु बलु पिशुम पनुन पान ।
पान्यर त्रॉविथ परस पोशुम
हरस हेछिम लागुन्य् गिन ॥

८५

अटु वॅरिथ ज़ंडु बार्यन
सेपि पॅहर्यन र्वपु गछ ।

बर वॅथिय मुंगुर्य दार्यन
गाँटु ब्रार्यन क्रुलु पछ ॥

८६

कावु गाटुल तति नो चलन
पॅर्य फ्यलन वॅर्य मॅहलाम ।
त्रुक्यन त्रॅन्नरिथ तुतुर्य कलन
ज्रंडु बलन क्वंग तु बादाम ॥

८७

शाह रज़ि रज़ि वस पख ज़ेरि ज़ेरे
यँदुर फेरे कतुन क्रूठ ।
च्वदुश च्रँद्रम च़ोरम नेरे
अमृतु वेरे च्रँदर्युन म्यूठ ॥

८८

वोन याम दिच़ोम ताम गॅय ग्वतन
सासव कथव द्युतुम ब्रख ।
सोन गव सोरुय वोन आव गतन
बास लोग प्रथन ह्योतुम थख ॥

८९

खँड हार लयि मा गिंदु क्याह ज़ारस
जराह दितिम बॉज़्य गारस कुत्य् ।
बंड दित्य् नागन टख द्युत तारस
दँह दॅर्य वसि कुस गारस सुत्य् ॥

९०

मारुकि बये लहा खँत्पु पानय
नारुकि लये दँज्जिथ गौव सूर ।
कार तु करतूत सन्युच्चयथ ज्ञानुय
वार मा वनुनस दारु गछु दूर ॥

९१

दयस वँम्पु प्रुछ ओनुत कते
मनु वुजमले कस लगी वोंत ।
पय यस यियि तवु कवु नो मते
अन्न वेज गले बवु ज्जलि ब्रोंत ॥

९२

वेहरु कथ गोख हा म्यानि पानो
वान छुय म्वकुल शेरुस दौर ।
वँहरि कयामत मॉर्यफति ज्ञान हो
हान छय होरुन्य मूरुख खोर ॥

९३

सोपुन्य आयोम दूहु अकि राजय
साज ओस ह्यथ सोंबुल शेरान ।
दोनम छिय मा बिय किनु ताजय
माजन तस यस गुल पॉरान ॥

९४

रुम रुम वँहलिथ रुह म्योन ज्जले
मछि मछबंद डले म्योन ।

मेच्चि म्यँच्च रले रछ रछ गले
अदु क्याह फ्वले नोव नतु प्रोन ।।

९५

सतन सँदरन थाव्योम ब्वनुय
दोव खोत वनुय नोनुय द्राव ।
मोर ओस मेच्चिथ म्वर्दय ख्वनुय
नोथ गव गोनुय छोनुय द्राव ।।

९६

हँदुर्य शाह हेतिम अँदुर्य
स्वखु ब्रारि स्वखा वुछुम नु कांह ।
सँदुर गँयम लूबचि नैदरि
हँल्य् टॉर्य अँछ फिर्य वुछुम नु ज़ांह ।।

९७

बँरगु बँरगु नीलोफरस
बिहिथ सरस करान राज ।
पाँच्चि म्वखु रँटिथ गरस
वाँन्त्य् वरस गँडिथ ताज ।।

९८

ब्रॉत्त्य् गँयम ब्रमय सरस
वाँत्त्य् दितिम बरस ताम ।
खूत्त्य् दितिम खोंखुन्त्य् थरस
शेश पंजि दरस वादय खाम ।।

९९

नगरु नगरु छँडिम वन हा
वनु कस सना वुछुम क्याह ।
नब्ज नब्ज कॅरिथ फना
अदु कथ मना करे ज़ांह ॥

१००

मनु हटु मन रोटुम कच्चे
तारच्चि तूलुम तु रॅटिम कन ।
दबु दबु वॉलिथ श्रोपरिम मेच्चे
वनन कुनिरिथ बन्यव स्वन ॥

१०१

अँदुर्य अँदुर्य अंदर गराह
गरस अंदर समंदराह ।
नलु वटि रोस्तुय द्वसि बराह
जाफुर्य मवहरि स्वनु हॉर्य थराह ॥

१०२

वनु लोग मेलाह ख्यनु रोस पानस
मानसबलस गौडुख जूल ।
ताह ताह रंगु रंगु आयस्तानस
लंजि ब्वन थानस ह्योर कुन मूल ॥

१०३

जिंदु पानु आयस मरन मरन
ग्वरन पेयस ख्वरन तल ।

हरन कोसुम दूदुर लरन
ज़र्यर ज़रन कौंसर बल ॥

१०४

किथु शाह गोमुत नॉल्य अरज़ोलुय
कवो छुख लोगमुत वालु वाशे ।
ज़्यतु मर स्वख दूख ज़न अरुखोलुय
वेह व्याज़ रिवान ज़्यनु बाशे ॥

१०५

पॉन्य पानय कुस छुख ब्याख
पानय खाक पानय कुज ।
पानय ज़ाख पानय प्याख
पानय श्राख पानय पुज ॥

१०६

दीशन दीशन दितिम वॅनी
मे ज़ांह नु कुनी अथि अदु आम ।
मनस दितिम पवनुन्य पॅनी
अदु अंदु कनी तीर्थ द्राम ॥

१०७

सत् ख्वगु कलि ख्वगु प्रथ ख्वगु बनी
दियि मनस युस युथ दाय ।
लछि बॅद्य ख्वग अदु कति ननी
च्वशवय गुनी हर ख्वगु ज़ाय ॥

१०८

शंकरु जटे चंद्रम रटे
शिव शहस कस प्युल दान ।
वन छा खसिहे छटि छटे
हू हा नु तस मिलुविथ िन ॥

१०९

लयि गछुन तु नयि म्वचुन
त्रेयि नचुन अंदर दान ।
फहि गछुन कहि चिंन
सुय वचुन आत्म ज्ञान ॥

११०

त्रुकून्य आरु तपोस्थानु
त्रयि अर्द पानु स्यंदयबल ।
पूर्ण चंद्र शिवु अंदु पानु
शुन्ययिकि स्थानु सहस्रदल ॥

१११

आनय दिचुन अंदुर्य ऑनय
स्वनय वगुव तु र्वपय खाव ।
खोटिस खँटिथ वुजि क्यथु व्वहनय
मोर रॉज्य् मॅरिस रिंदु जिंदु द्राव ॥

११२

कुलुफ मुचरिथ वंदुकिस डबस
अंदुर्य नबस लागि व्यस्तार ।

तारख मंडुला जून बिहि गबस
सिरिं सवि तय जगि ह्यसुमार ॥

११३

लछि बोद शहन ज्योव
शाहन सासु बोद ख्योव ।
कुन प्रोन तु क्याह नोव
कुस जाव तु कुस गौव ॥

११४

क्रेंकु बलु मनु सारि हंसा ड्युंतुम
पोशि नूल बोझि बोजन तार ।
नजर पिलिथ थजरु ब्युंतुम
रोशि होशन चीतन गार ॥

११५

अलिफु अंदर हय
मीम दाल मदु वाल ।
फुरनय वजि नय
गनि होल ननि लाल ॥

११६

नन्यर सोरुय नोनय हॉविथ
सन्यर लबुन पानस ताम ।
ज्वनुक जान्यर कंदे सॉविथ
मनस रॉविश ह्यनस साम ॥

११७

ऑनस ऑनस मंज़ ज़ाँपानस
बिहिथ पानय तुलिथ डूल्य ।
नँन्य कथ ज़ॉन्य वोन क्या अनज़ानस
वँन्य शैछ पानस वुठ वँल्य बूल्य ॥

११८

कवु नो पानि अँदरी फोटुख
किथो रँटुथ व्वखुर्य नाव ।
ह्वदु हरि पोत गरि हँत्य हून्य च़ोटुख
ज्यवव छोटुख मोदरि बाव ॥

११९

कर्मु कोरव यस कर्मस फरे
दर्मुकिस दारस दियि क्याह पोन ।
नक्द नु सोदा पोन्न कवु ज़रे
वुछिवुन कोतुर बुछिनय ओन ॥

१२०

कपुस्य कुलिस क्वंग नु ब्वन
नफुच्च्य राजस दी दी रॉस्य ।
द्यानु मूनिस ति म्वख्तु नोवुन
बानन तँछिथ दानन खॉस्य ॥

१२१

अँगु क्वंडन स्वन जरन
म्वख्तु विँ हरन ज़न ।

रूपु सँदरस नावि तरन
सरन अमृथ बरन वन ।.

१२२

ताजस सब्ज प्रवु प्रवन
पद्म पद्यन प्रजलन लाल ।
साजु साजंदर छिस ग्यवन
वतन वथरिथ गुलि गुलाल ।।

१२३

कैहन ब्रख तय कैहन तौरी
कैह अथु मूरान ख्यावान फ्यख ।
कैह गॅयि नॅख्य ह्यथ कैह अटु बौरी
कैहन यौरी करान छख ।।

१२४

कथन मंगुस छ्वपि हुंद बाश
क्वठ्यन मंगुस बिहुक जोश ।
अँछन मंगुस वन्युक गाश
कनन मंगुस ज्वनुक होश ।।

१२५

जप हिरि गॅनिरिथ यलु गव दरय
आगुर वॅछमुच्च लछि लंजि बून्यु ।
अपोर पॅरिथ कूठ के सरय
आजायि मंडलस रंगय दून्यु ।।

१२६

सब्ज नागा मंज कोहु आरस
जुत कर मा टाल वुठ मुहु ज़ाल ।
राज़ हंसा गछि पैजि तारस
लौछल ललवान करिय माल ॥

१२७

बुबर खसान येते त्रागस
मागस येते श्रावन जोश ।
चंद्रचि प्रेवि लवु तते बागस
आगस प्रेयान तिमय पोश ॥

१२८

दुहचि गटि तय रातुचि वि
कवु नो शिवस चैनान छुख ।
युस तति मूद तय सुय येति जेवे
सुय दवु दवे तँस्य् अदु च्छुख ॥

१२९

टुकु टुख यस च़ेज सुय स्वनु कंदे
स्वखय सेंदे करे राज ।
बदरस लोग यस तस क्याह अंदे
दँथरि कलस अँथरि ताज ॥

१३०

रंगय आरच़ क्वंगु कोस्तूरी
हंगस स्वनु म्वख़्तु जूरी छुख ।

रूशित्थ कवु छख कस छख च्चूरी
संसौर्य ब्रह्मसौर्य लेतरे टख ॥

१३१

गिंदुवुन जंदु मा द्युन अरुखॉलिस
वगि गुर आगुहन वुज्जित्थ गव ।
पहि रोस रथ गव अथु दिथ पॅहलिस
डाकुवोल नाहकु वति फाकु फरि प्यव ॥

१३२

कावु शुप्य् ज्यव कड लवु फिर लालन
संगेमालि प्रोव बालन गाश ।
ओम पन प्वख्ताव म्वख्तु तरि मालन
शंखु हेछ ज्यव दिन्त्य तालुक बाश ॥

१३३

ब्वदि हुंद द्दुद चे क्वदु कड पानस
मानस बलास कर पॉराव ।
श्वद वानि श्रान कर ह्वदु शीश दहानस
बागि यिय पानस तिय वर्ताव ॥

१३४

रेशव राशि यिथ रुह रंबुनोवुख
गिंदिथ बोवुख अंदुक गाश ।
अंदु वंदु, बंदु बंदु, व्वंदु रंजुनोवुख
राशा छोवुख तु असि क्युत बाश ॥

१३५

जूग्य रोगि रोगि यिथ रेशुताह होवुय
सीनु बँ सीनु राज़ बोवुये ।
ग्वडु ग्वरु वाखाकनु परुनोवुय
नैद्रायि आसन गिँवुये ॥

१३६

शिवन शक्ती ग्युंद छ्यपु छारे
शेवस शहन गँयि मिलुवन ।
स्वरुनय साज़ा ह्यथ ग्वडु सारे
राज़स करान साज़ु मिलुवन ॥

१३७

जूग्य द्रायि मंज़ आरु वारे वारे
वशि ह्यथ वशिनव सुत्पु बारुवन ।
माया मौंड ह्यथ त्रोगुनि दारे
त्रुवॉर्य तारे ज़गि डुलुवन ॥

१३८

सतु पूर्य लरे अँर्य पॉठ्य चाये
कुठ्यन वँरुख बाँग्य बाँगरन ।
मँत्यु बीठ्य लोत्पु पॉठ्य पनुने जाये
शिव रुद हेरि शेरि रज़ु अँलुरन ॥

१३९

मायि आयि वर कोड कारि कायाये
कामस ह्यथ च़ोल काचु ब्रोर ज़न ।

ब्रह्म क्वंडु श्रान कर छलु मायाये
संतोश अर्गु पोश त्रन बालकन ॥

१४०

क्रूदु ज्युन मुहु स्युन रन वासुनाये
कर्म क्रोत रुत रुत बल दियि ख्यन ।
जॉन्यु गव ज्वनु प्यथ ज्ञानुकि आये
कशि कोडुन गशि ज्वनु डाकु डॉनि कन ॥

१४१

बलु बाग्यवानस द्रायि त्रपु वारे
आत्म गव परम आत्म जन ।
कोन ब्यूठ अँन्यु पॉठ्य रंगु पहारे
जोन्यु द्राव नँन्यु पॉठ्य रँन्यु गिलुवन ॥

१४२

स्वर्गु हूर स्वनु कूर द्रायि पोत दारे
रतु बॉरव ऑस्यु वतु डुवन ।
बँदु दून्यु सँदु खँन्न सुमु सवारे
शीनु डबि जून दारि कृष्णु मिलुवन ॥

१४३

नखुक नरकोन मखु क्यथु दरे
हखु दिनु परे तोतु क्या राम ।
फवलि मा बुमि पोश ह्वछिमुच्चि थरे
मोत ब्यूठ गरे लरि क्याह क्राम ॥

१४४

कुस छु पनुन कुस छुय ब्याख
खेलिस श्राख कलस प्यठ ।
कस आख बागुन्य् वॅगमिस ज़ाख
बेयिस बाख पानस नठ ॥

१४५

नठ नदहरनि यठ लगी पानस
डलि ऑनु खानुच पॉरी ज़ान ।
प्रलयिकि प्रचंडु खस आयस्तानस
रुन्नि गरि ग्वडु सरि पुशरुन पान ॥

१४६

ख्वडु मोंड्य सिपाह कलुहेरि डेरन
हरदु कालु नेरन वीर्यन पोश ।
ग्वडु वॅर्य गरदनि मीलु पचि बेरन
सोंतु वावु यीरन दरदु हरदु रोछ ॥

१४७

नख ह्यन नकुल्य्, वख गछि ग्वबन
ज्यव यियि लबन नोव नवि रोश ।
पानु पुछ्य पॉराव तोशिखान दूबन
कोछ रटि नबस कौंड गछि पोश ॥

१४८

शीसि डबि तालव नखु खसि ज़ून
पकनस च्नीन्य् बुनिल्य् यठ ।

अंदु अंदु मून्य् चोर मंजबाग च्यून
ग्यवु क्रौजि डून, वारिल्यन कठ ।।

१४९

ग्राकन गूल्य्, श्राकन हूल्य्
माहरेन्य् डूल्य् वौरिव गॅयि ।
मौल्य् सुंज नु मनन, माजि हुंज नु बूल्य्
अॅक्य् खेयि ठील्य्, पोत वौल्य् पेयि ।।

१५०

गुपन गानस पॅहॅल्य् नयि
मूलन यंगु पॅत्रन सयि ।
पॅथरिस क्वमु लूकन खयि
गामस अॅहरु, पानस बयि ।।

१५१

युथ नो बावख, बतु लेज ख्यावख
कावु सुंजि तौंति दरि मा माल ।
अॅदुर्य् थावख, पानस छावख
मैडि मैडि ख्यावख सबे साल ।।

१५२

वुफि युन नखे राजस डखे
अॅकिस गरस सास बर ।
युस यिनु थके, ब्रौह कति पके
गौंब गछान बौज्यगर ।।

१५३

करान गॅजगा यथुय पानस
तथुय ऑनस प्रुछ्यतव ज़ाथ ।
स्वलबु स्वल सोदा पानु छु वानस
न तस द्वह तय न छस राथ ॥

१५४

असनुचि त्राये वदुन ज़ानुन
वदुनुचि त्राये असुन ज़ान ।
शब्दा ग्वरु सुंद हरु सुंद मानुन
ग्वरु पादन वंदुन्य् प्रान ॥

१५५

स्यंदु बलय व्वंदु छोलुम
मकय देरुम साँकयराथ ।
अमर नाथुय सातय फोलुम
शक्ती सोरुम कुलि कायनात ॥

१५६

तोमुल, पोन्य, तील नून कॅरुम वॅरुय
मनशय कोरुम गणिशस साल ।
तुंबु नॉर शंखु डोल, छ्वन्य् छ्वन्य् हॅरुय
शिवस त्रॉवुमॅ जुवय माल ॥

१५७

कंगस बंगु तय ज़्युन हंगस
रंगय रंगुन क्वंगय पोश ।

रंग हे रंगनुक सादु संगस
हंगु ज़ाल ज़्युन तय क्वंग दियि जोश ॥

१५८

यमस दूहु अकि वोनुय ब्रमन
चमनस म्यॉनिस कज़ख पोश ।
यमन दोपुस म रोज़ खमन
तावय तॉविथ डालख रोश ॥

१५९

ज़ारस गिंज़ोम ज़ेनुनुचि यि
ब्याज़ गव थोद तय खोतुम बोश ।
साज़ाह वायोम बोज़नुचि लये
राज़ बलु वाज़ वानु डॅलिम होश ॥

१६०

रंगु मंदोर्यन दितिम गतय
पॅतिमि वतय मॅशिथ गॅय ।
ताह ताह खोरुम माज़ तु रतय
शाह गॅयि छ्यतय वती रॅय ॥

१६१

छिट्ट होर वुछुम आसमानाह
ककव जूर्याह पकस ऑस ।
वाँट्य् होल चाँट्य् खोल कतरि बानाह
ब्रमु बोज़ दाना ख्यथ गॅयि रॉस्य् ॥

१६२

लोलु दोनि मंज ख्वनि रटि युस व्वटे
जैवे अमृथ छटे सुय ।
ब्रह्मांडु वुजमलि रव युस रटे
कालुनि जालु कति नटे सुय ॥

१६३

च्य अय अटु तय च्य मंज गारस
च्यतु व्वंदि यारस सटु अदु क्याह ।
च्येय मंज फाटुविथ च्य प्यठ तारस
चे तु बॉज्यगारस यिकुवटु क्याह ॥

१६४

त्रु सैंदि श्रान कर ज्ञान कर गारस
पृथवी आकाश मिलुविथ दून ।
शेश्तर्य नार ज्ञन अछ चंदन दारस
वसि मदु बनि अदु पारस स्वन ॥

१६५

कुस छुख पानय वॅमिस ज़ाख
कते आख गछुन कोत ।
सुय येलि पानय तस कुस ग्राख
अदु कुस ब्याख वॅम्य् अदु ह्योत ॥

१६६

ब्रमस ब्रह्मुक ब्रम कवु प्योयो
सॉर कवु लॅजयो बॉर खर ज्ञन ।

ज़हरस अमृथ ब्रोंत कवु गोयो
खेय खेय चॅल्य् नो यमस खन ॥

१६७

कलि मल चलि अदु पोन्य् वुज़ि नागस
चु चमि, बु हमि नोव नवि जोश ।
गोशि गोशि पलजुन आत्म आगस
अदु लल त्रागस फ्वलि होशि पोश ॥

१६८

हुजत करुनी तस क्याह वेचे
युस रचि रचे तु कचे छुय ।
चेनुवन दिवान व्वंदु तय हचे
कस कूत पचे ज्ञानान सुय ॥

१६९

कुस सनु नरुख तय क्याह सनु स्वर्गस
च्यतस त्वर्गस चेनान गछ ।
ब्रह्म सरु वारु पर बॅर्गस बॅर्गस
हथ बर द्वरगस थिं बरु अछ ॥

१७०

टोठ मे द्युतुम बठिके आये
सीरु सर, वीरु बल, यीरु ज़न गोम ।
होट मे दिन्नोम कटु संज़ि त्राये
गारुचे माये औंद कुन प्योम ॥

१७१

नोटाह तुजोम नागुचि राये
मदुचे माये पातॉल्य् प्योम ।
व्वठ मे लॉयिम त्रेटि हंडि आये
ग्वरु कृपाये अथु रोट गोम ॥

१७२

रंगु रौंगुम रंगुचे माये
गोट गोम पोट नवि रंगुन प्योम ।
रंगुर्य रौंगुम बे रंगु आये
बे रंगु रंगस क्वंगुय गोम ॥

१७३

लयिचे लाकमि ख्वये खोरुम
वगे रोटुम द्युतुमस फेश ।
च्च्यथुय च्चोबुम च्चंद्रम दोरुम
दिवय प्रॉवुम त्रोगुन वेश ॥

१७४

क्रकृ मे दिच्चमस कुने नावे
क्याह अदु श्रावुनु या अदु कोह ।
सोरुय तोरुम कुने दावे
शीरिम बाल तय हूरिम क्रोह ॥

१७५

अंदर बिहिथ च्चाकय वारे
कुनुय स्वरे द्यन क्यो राथ ।

वेङ्ग ब्वद व्यगलन तील ज़न दारे
यमु बय हारे इन्द्रस माथ ॥

१७६

गाडु ज़ाल रटि क्याह पानि रोस आरन
मंज़ छंबु छारन दरि क्याह ठोठ ।
ब्राँत्य् द्यव पन्नि क्याह तस नय मारन
द्यारु फोत्य् नारन शाह रगि नोठ ॥

१७७

अँछन बीठिम तेह अंबर
वछस दितिम हचिव्य् कॉन्य् ।
गाश ज़ोनुम संसॉर्य् बंबर
दार फाटुव पनुन्य् पॉन्य् ॥

१७८

ककव बूल्य् गॅयम कनन
समुहार्य् मानन वॅडुम कल ।
कुकिलि बोलि त्रास ह्योत मनन
ह्यस प्यव ज्वनन मानसबल ॥

१७९

कावु कले क्वले त्राँविथ
ब्वद मनस ख्यॉविज़ि क्याह ।
वावु जामन पॉरॉविथ
नावु रँस्यत्युक बाँव्य्ज़ि क्याह ॥

१८०

वुठिथ वॉलिंज बहनोंवुम
अँदुर्य छोवुम पानस पान ।
पनुन आसुन पानय गींवुम
पानस लॉयिम पानय कान ॥

१८१

पानय ज्ञानुन पानस ह्युवुय
यसुय ज्ञाख तसुय ज्योव ।
न छु शवुय न छुस जुवुय
म्वखन बदलिथ नवम नोव ॥

१८२

सीर बस्तुय पान ज्ञानुन
यावुन ज्ञानुन श्रावनु शीन ।
वारु छॉनिथ फ्यारु फ्यानुन
सतन गुर तय हतन जीन ॥

१८३

दँहवुन्यु हसत्यन लाकम येमिस
प्रणव कमान तय प्रान कान यस ।
क्वछि सुय राजस ब्वछि कति तँमिस
तँम्यु चव दामु दामु आनंद मस ॥

१८४

मेच्चे मेच्चुय वुछिम क्वछे
मेच्चुय मेच्चि ख्यावान जुव ।

मेच्चे वुछिम मेच्चे हुंज ब्वछे
मेच्चेय मोच्चिथ ज़ोनुम शिव ।।

१८५

मेच्चेय ज़ोनुम आत्म आकाश
मे च्चे वुछुम मेच्चे हुंज प्रय ।
मे च्चे वुछुम सासु सिरिथि प्रकाश
मे च्चे वुछिम शक्ती लय ।।

१८६

सिरियुक प्रकाश प्राणय ज़ोनुम
आत्म ज़ोनुम द्यानुक द्यय ।
पवनुक दवुन ग्यवनुय ज़ोनुम
पानस पानय गॅच्छिथ लय ।।

१८७

पांजुन पॉतुर बार ज़न मन प्योव
आवुठ पन गव वोनव क्याह ।
व्वंदुक्यन सीरन कुलफु रोस दनु गौव
हेलि रोस अन्न गव लोनव क्याह ।।

१८८

अदुर्य मैड्य वॅक्य् मोदुर्य ख्योवुख
पानस वोयुथ पानय डोल ।
शाहबाज़ु यँदराज़ु वॅक्य् वीरु पोवुख
तस सीर सरु गव येम्य पान गोल ।।

१८९

पां लेजि गजि तावु म्वख्तु कवु अंदे
तोमलस सँदरु मंजु यिया छाव ।
होल अदु गछि क्याह लोलु रोस वंदे
लोगु हुंद तोगि वुर जगि प्रुछ बाव ॥

१९०

छ्वह येलि लोगुम, छ्वह अदु मँशिम
छ्वख दिथ गुशुम पनुन पान ।
पनुने ग्रटु बलु पान येलि प्युशुम
सुय येलि च्चुशुम गँयम ज्ञान ॥

१९१

बिंदुय मोच्चिथ रिंदय नच्चे
पानय बोज्जि पनुन ग्योव ।
वखतबु त्रॉविथ अखतबु म्वच्चे
तस क्याह वेच्चे यस युथ प्रोव ॥

१९२

आत्म राजस मन कर लये
बंदन म्वख्ती मनुक ब्रम ।
यछ पछ दृढ ऑनस नु खये
आदि ओंथ नये सुय सूहम ॥

१९३

अकुय येम्पु ज्ञोन सुय गव यँच्चुय
सुय प्यव प्रँच्चुय वुहुवुन पान ।

अद्वय आत्म राज्ञु यस मोच्युय
तस ज्ञानु विज्ञानु पानु शिव ज्ञान ॥

१९४

यसुय ख्वनि तसुय ज्ञाख
तस क्या नाव ज्ञाने कोह ।
यसुंद सोरुय तसुय ग्राव
नाहकय लूब लांगुर्य मोह ॥

१९५

संसार ब्रमु बॉज्यु सॉरी मानन
असलुक ज्ञानन जगि मंज कांह ।
च्यतु व्रॅच शान्त यस संकल्फु फानन
जगि ब्योन नु ज्ञानन पानस ज्ञांह ॥

१९६

मस पानु मस ह्यथ मसु मॅचरवान
खंबुकुय काँसि नु पावान पय ।
यस युथ ह्यस यियि तस त्युथ चावान
पनुने वानय पानय च्चु दय ॥

१९७

नय छुस पाफ तय नय छुस प्वन्यु
नय छुस आराम नय सफरन ।
नय छुय ज्ञोन तय नय छय जॅन्यु
नय छुस हरुद तय नय सौंतरन ॥

१९८

नय छिस ग्वन तय नय बे ग्वन
नय छुय कुन तय नय छुय दून ।
नय छुय आगुर नय छुय वन
नय छुय हेरि कुनि नय छुय ब्वन ॥

१९९

नय छुय फाकय नय छुस ख्यन
नय सुत्तु ज़िंदन नय म्वर्दन ।
नय छुस ब्यन तय नय छिस र्यन
नय छुय नार तय नय तुरनन ॥

२००

हर फन मोला हर ज़ॉन्य ज्वन
शेनुवुन्य तरफन बासु बासन ।
नय कुनि अँछ लागि नय कुनि कन
सारिनुय सॉरिसुय मंज़ हन हन ॥

२०१

नय मँस्चि नय मारुनावान
नय ज़िंदय नय ज़िंदुनावान ।
नय रॉविथ नय रावुरावान
बस छु गिंदान तु गिंदुनावान ॥

२०२

त्रेशवय तह दिथ हेरि क्योहो ब्वनय
लोहरनु यिवान तह बर तह ।

यूताह सनुय त्यूताह ग्वनुय
कितु यियि वोनुय वुछुम क्याह ॥

२०३

मनि कास ज्वलय हवा तारु क्वले
बुमि तारु दरस वस बवुसरस ।
पकू थलि थले च्चंद्रम फ्वले
छलु अछ बरस जूल मानसरस ॥

२०४

सर रठ गले आसुन च्चले
तुर तथ नारस सोंतु पतु बहारस ।
फेर हलि हले सास बास फ्वले
मेल बा यारस च्चु ति तथ शुमारस ॥

२०५

वुछ वुछ वुछ लगन दनस
अंद मनु लागि क्यथु बेयि संज छाल ।
पानय अय फनकार नियि कुस फनस
वेज कुस च्चूर फरि च्चै नु स्वनुमाल ॥

२०६

पॉन्य पानय पान रावरोवुम
पॉन्य पानय ह्योतुम पथ ।
पॉन्य पानय यंदर्यन ख्योवुम
पॉन्य पानय हॉरुम सथ ।

२०७

गोल गतव गनिरु गीरिथ
शीरिथ थॉविम पनुन्य् प्रान ।
शहू हॉकल गगु नीरिथ
गुतु फीरिथ अमृतु श्रान ॥

२०८

च्युय अय आकाश च्युय अय पाताल
च्युय अय गटु गाश च्येय द्युन ह्योन ।
च्युय अय रखिपाल च्युय अय मुहु ज़ाल
च्युय अय दयाल तु अदु कोनु नोन ॥

२०९

लॅदरस बॅदरुपीठ तल पातालस
सॅदरुक आगुर प्यठ आकाश ।
मंज़ कनि जाया ग्रासुक्य् कालस
ज़ीवु जंजालस पिह्य पिह्य नाश ॥

२१०

कालु चॅक्रस रॅटिथ नालय
अंदु अंदु वछस गंडय हाह ।
सेमंज़ लछि बज़ु तारख मालय
बालु पतु बालय गाहु पतु गाह ॥

२११

न छुस अंदय न छुस ओंतुय
अदु किथु वोंतुय लब्यस कांह ।

छांडान गछन कल्पु क्रोंतुय
न छुस मोतुय न ज़ेवि ज़ांह ॥

२१२

वछस अंदर रँटिथ खँटिथ
पाँन्य पानस त्रावान ज़ाल ।
मचे अंदर मँटा वँटिथ
ज़चन चँटिथ दिवान लाल ॥

२१३

मेन्ने वुछमय चँद्रुचि ख्वये
मेच्यय वुछुम पूर दर पूर ।
मेन्ने वुछमय अमृतु ज्वये
मेच्यय वुछुम नु पानस दूर ॥

वाख
व्यथ मा छि शोंगिथ
बिमला रैना

**Rewritten in Standardised Devanagari-Kashmiri Script by M.K.Raina,
Vasai, Mumbai with due permission from the author.
My sincere thanks to her.
Work completed on 12.02.2005 ~ Updated 09.04.2020**
